

摘藻堂四庫全書薈要

集部

欽定四庫全書薈要

集部

秋澗集卷十九

二十

詳校官助教臣謝登雋



欽定四庫全書薈要卷一萬六千一百七十五

集部

秋澗集卷十九

元 王惲 撰

七言律詩

老境六詠

并序

夫人百歲如駟過隙能幾七十者又復幾人所謂

倘來外物猶浮雲過目亦何足道哉因感壯年所行  
多輕生之事趨前太猛一也讀書過分二也飲酒無  
量三也妄慮坐馳四也喜談耗氣五也戰藝多勞六

也不肖今年已踰六旬念此六失覺五十九年之間  
何翅是耳而驚而愕且畏且怖豈勝既哉故養生之  
念蹶然生於中蓋其勢有不得不然者因作老境六  
咏庶幾與我同疾者聞之不無稍有所戒亦老者安  
之之意也至於直達性情以救徃失初不以工與拙  
為計也幸觀者無誚至元二十四年冬十一月一日  
秋澗老人謹白

飯飽即步

殘書讀罷午餐餘信步徐行當澤車接武經過道德里  
談玄時到故人廬老便步穩靴無韞靜愛聲璆佩有琚  
相送歸時燈已上到床一枕即華胥

目倦忘書

辛苦雙明六十強滿前花黑理應常酒杯縱對甘無分  
書卷相看任久忘虛室靜深便默坐午牕晴爛怯餘光  
悠悠未了三千牘吟諷從今付窟郎

言慎養氣

聚首閒談足是非到頭贏得小人歸屬垣有耳當捫舌  
守口如瓶慎動機珍惜無先吾氣浩坐忘深識道心微  
客來客去俱恬靜克已存誠恐庶幾

食甘戒飽

食前方丈肉如林莫遣分毫胃氣勝百解盡從中所過  
微軀能不病相仍已饑便飫甘能止過軟雖鮮熟即乘  
此是老坡真聖藥免教攜杖去騰騰

寤寐絕思

夢神依例倒殘更目似鰥魚了不瞑正為胆寒增展轉  
不緣身老惜伶俜滌除玄覽歸安靜宰制心君入杳冥  
昨日早興襟韻足不知青鏡鬢星星

息藝休心

辭筆縱橫更老成祇來虛譽不根經風雲滿眼嗟何有  
月露盈筭笑未停肆口成章終妄作忘言休思是頤齡  
子淵直在心齊妙一字何嘗及性靈

坐倦即眠

坐暖蒲團倦自然夢歸先到蝶飛邊  
脊膺癡絕凝盤石  
肩井斜傾似墮鳶香散餘馨栖翠被  
竹搖寒影掩殘編  
老來境界無多味饑即思餐困即眠  
一作不教怠氣加  
吾體愛殺中和論  
性  
篇

香冷燈殘靜枕幃竹窻幽思獨依依  
時情久與詩情淡  
銳氣今從夜氣歸空控孤膺堅鶻坐  
漸驚縫掖擁腰圍  
黑甜滋味雖同體未分甘從朽木譏

汲城懷古



尚父祠荒草滿扉五城猶在陣圖圍飛梁水落橫霜瀨  
石馬門空半夕暉竹簡有光陵寢破山川今是昔人非  
臨風笑煞安釐事甘著虛名博禍機

夢王尚書子勉時罷中丞在揚州

丁亥八月二日

分明昨夜夢王褒海上歸來從鳳毛燈下留連乘醉月  
筆端揮洒挾風濤滿囊文具為余贈四座春風倦士豪  
羽客忽從窻隙去惘然驚覺聽雞號

冬藏

木葉歸根到閉關  
遇藏初匪避冬寒  
孔宣何苦帝三絕  
顏氏胡為樂一簞  
庭戶信知吾道在  
光陰移入畫圖看  
此邦雖小無窮事  
定力先須似石盤

小邑都來掌許間  
紛紛人事日多端  
敢言絕學來希孟  
不解呼廬去效韓  
身老轉驚謀道拙  
時艱難作強歌歡  
正須一室虛明地  
時著閒身引睡看

丁亥歲十月十日夜夢乘舟渡一大河既濟望  
南岸一閣高數百尺窻戶北向有簷至地上

下以琉璃大簾垂蔽翠色半天甚奇麗也

雲間高閣翠為簾疑是仙居擁衛嚴虹影蕩搖青帝闕  
海風吹墮寶陀嵐半空倒影驚奇絕十丈遙光入顧瞻  
我自平身多異夢似憐方朔詫雄談

筍飲

李縣丞靖伯約嘗新釀坐客有云酒之醇粹莫胚胎  
若也遂筍而飲之偶得獨脚句醉歸為足成之如能  
可君等雅意便當屬和時至元丁亥冬十月八日也

瑟縮松風滿甕春甕頭筍飲有餘薰醉鄉日月時須到  
太極胚胎昔未分肯放小糟珠作滴換傾浮蟻玉為羣  
人間愁緒知多少一釃能消正要君

誰擬鯨吞罄綠樽一杯聊示試芳溫中含妙理何多味  
細捲春江儘帶渾談藉清光搖北海詩憑風韻繞西崑  
知君預報時須意免致來敲月下門

透月巖

偶到君家思適然一峯奇石墮吾前千金欲買初無價

百穴潛通小有天花露透香滋碧潤月娥含影愛幽妍  
從今紫翠芙蓉夢不到齊州落照邊

成氏西灣卽事

栽種西灣趣已成主人置酒約同傾小車來駐林間閣  
藜杖閒看雨後耕老圃生涯非細事滄浪清濁任吾纓  
少陵苦愛溪居好興在千章夏木清

南陌東城占却春西灣深處最藏身青茅破粒采桑穉  
紅袖迎門杏蕾新醉裏風光多樂事老來清貴是閒人

就中更愛清溪水隔斷西風庾亮塵

壯年心事幾虧成每對蒼髯聽細傾夢裏江河幾走遍

林間雞犬却歸耕潘輿正要閒居賦蘭佩誰堪海縣纓

脫却烏紗有忙事甕頭春釀漉生清

海縣纓暗用解蘭綯塵纓事海縣調

周彥出為海縣令也

清明日花下獨酌

時戊子歲廿七日游洄溪作也

人家拜掃重清明羅綺翻香曉吹輕不欲把書成兀坐也隨游子出重城閒雲弄日何多態春水平橋不礙行

勝事自知還獨往一壺來就淺沙傾

後一日雨中招飲韓李二君子小酌且為梨花

洗妝

時新植梨花  
一枝盛開

花滿金瓶酒滿樽一杯歡飲得佳賓近年樂事無今歲  
此際閒身有幾人祿美勝於三品料臘香清徹六根塵  
風簷數點催妝雨辦與梨花作好春

東坡汲乳泉圖

儋州遷客玉堂仙服食天教得乳泉三咽遽驚滋浩氣

一甘無壞是冷淵中朝清議孤忠裏漳海鯨波九死邊  
落月澹隨人不見滿襟風露獨翛然

道宮獨發乳泉香似與坡仙養浩方井列不從炎海瘴  
味甘還比上池觴化機軒豁元胎濕孤影追隨月色蒼  
天地此身忠義在一杯三咽濯肝腸

送姬仲實隱士北還

紛紛末術倒從諛邂逅淇南論有餘賈傅自憐多感慨  
東門何意泥孤虛雨連賓館留三宿天遣幽懷為一抒



覺我胸中聞未有九峰新說歷家書

壽器之國醫

學開金櫃得真傳濟物功深不自賢前輩衆推揚獨步  
後來誰與子爭先青黏有術扶衰謝白髮相看度歲年  
此日樽前祝君壽一杯還代上池淵

白簽事彥隆哀辭

素菴一氣本龍終心苦時違孰與同強仕有為三品料  
發言多是四書功愁隨野草憂春雨恨滿山城對月宮

誰謂魯齋興起地古共門外便秋風

王師中哀辭

玉樹庭堦自幼看九霄雲露到鵬搏天門折翼嗟何及  
宅相論微理未安咄咄向空書怪字涓涓揮淚濕門闌  
應憐遺愛祠前栢恨鎖秋風月影寒

壽少尹寶同知

寶丁平章子

秀稟金天一氣晶規模全是漢專城當官治劇有餘裕  
臨事知機見老成門闕起身真相種天池刷羽看鵬程

一杯領取千秋壽細看檀槽合玉笋

顏氏冠詩寄蒲城主仲白祠李知觀

一握儒冠綴七梁金絲勻織玉為相顧瞻遺製從顏始  
陪侍先師見色莊巾卷在庭聊束髮玉簪橫影夢升堂  
切雲莫羨如箕大曾冠三千弟子行

紋背藤梁玉色瑳師傳元與薛同科

薛模為西漢冠師出高帝紀

要

盤白髮三千丈間過春風十二科衰俗幸存加冠禮滄  
浪無用濯纓歌敝餘改作須重丐主導先期為細磋

朱砂餅菊詩

并序

秋澗翁觀花於秀春園見菊之種甚多有所謂硃砂餅胭脂紅予謂白與黃菊之正色今變幻若爾何哉或曰接之於艾致然予試為之說曰艾火草也菊亦陽種也以二物方盛之時使客於艾之末末有不隨其主之盛氣而變者又赫以鮮者陽之精也故有硃砂之異此雖小事亦氣化之類也格物者不可不知故序

玉餅金蟬爛漫秋朱砂為質更風流天機欲測司花巧  
物色先從氣類求孕秀似隣勾漏井分香當上絳霄樓  
朱顏厭對柴桑客恐睹空杯笑不休

送錄事薛彥暉秩滿北上

秦隴風聲化有邠規模况自左山來三年敝邑淹良驥  
一日銓曹得茂才撫字論功書上考庶能覈實到蕙該  
春風領取新除去喜動關山兩翼開

王尚書子勉挽辭三首

淚洒行間閱尺書  
訃聞三至尚疑虛  
佳城一閔無開日  
聯事三年忝貳車  
詞筆早推韓愈健  
曠懷未覺孔融疏  
那知一夢終天別  
惆悵春風隔綺疏

少孤綿歷太速  
遭杜甫光榮四十年  
氣運倘來方出限  
愛心先斷便終天  
覓飛楚些和雲慘  
淚洒淮壩與海連  
左袒客衣三匝去  
延陵宜為聖稱賢

婉孌英姿自妙年  
奎光空照玉堂仙  
空教一世龍門重  
誰遣三王鼎足偏  
曠度包荒無徼略  
秋濤翻海失鱸鱸

百觚未醉螺臺酒重為斯文一泣然

遊蒼峪青岩山有懷烈士甄濟

重義於生視若歸封刀無復逞霜威千年喬木高風在  
一片青岩烈日暉元稹論忠真不愧杲卿推逆與幾希  
環山弋獵猶知畏白鳥冲烟自在飛

商左山副樞承屢念及作詩以答雅意

四十年間凡九遇感公翦拂使長鳴三蒼論法傳餘蘊  
七札量能綴賤名曉日岳祠留語別秋風韋曲餞予行

傷心綠野堂前月空遣留光照斗城

賀士常侍御受吏部尚書

識見久歸清議裏恩光今著履聲中文章曹植波瀾小  
星斗潮陽譽望隆除重不知黃散目翰成思補燮調功  
從今不鎖春風部管取銓衡被至公

題懷孟路宋總管太夫人九秩詩卷

七十邦君九十親人間此事少同倫栢舟高節徽彤管  
鸞誥清光照畫輪步履不緣扶杖健精神猶比結褵新



河陽莫說潘安樂沁水花前別有春

身寵家溫親老健福全無似宋門榮漢宮傳訓班儀在  
萊子承顏綵袖新孤節勁餘湘水竹九齡春動野王城  
年年壽席聞佳語南極星邊婺女明

和陶主簿見寄詩韻

時主肥  
鄉簿

平生鄉國共游居老去文交樂更餘苦厭物情多薄相  
每吟風雅入吾廬一官稍得寬民力三飯何憂進野蔬  
聞說別人真吏隱竿頭還有再懸魚

答何劉二端公

屢有人來問起居近年為况果何如每承省錄常深感  
欲話行藏不敢書逐末有慚規什一歸田無力把犁鋤  
時時夢到霜臺月靜聽烏聲尚起予

挽李子陽

蚤歲龍門接茂才相攜有意上階台夜書肯信元康在  
試思爭高岳掌開落月滿梁清夢斷旅墳三尺野烟埋  
微官殆似台州鄭拊卷題詩擬八哀

又

三十年前成邂逅酒壚傾徹醉顏開  
筆端力挽狂瀾倒袖裏親攜太華來  
淚洒行間遺草在恨埋泉壤劍鋒摧  
因思秋雨蒼苔句何限令人不飲哀

餞士達御史

通家世契鬱蘭金驄馬南來屢見臨  
披露義襟餘悃悞酌量時務入精深  
眼中白壁真無價調外朱絃有賞音  
回首炎荒四千里一杯不惜為重斟

小園即事

閒來無事欲何營總是栽花種柳情  
汲水溉餘紅藥秀遶欄看得綠陰成  
身參化育行當健物喜安舒悟養生  
放下虛窓時倦卧夢驚還聽乳鳩聲

小園清潤稍堪觀翠有庭筠馥有蘭  
未放薔花金作蕾已開梨蘂雪為團  
鳥欣有託扶疎樹客喜來憑話曲欄  
深院日長須細履也勝愁坐兩眉攢

托陶晉卿借鄭氏所藏劉房山行草效吳體出

入格

房山一字三過筆此帖揮洒何其殊臨游親覩長史作  
透綃又是涪翁書春葩舞女多姿態遠韻高風見步趨  
手追心慕情正切託君為借今何如

復作一詩以繼前韻

鄭家數幅房山書自笑伎癢須臨摹五陵裘馬見年少  
兩漢劍履多文儒游談得叙真可壯破塚求法何其愚  
煩君更擊馮夷鼓未信驪龍不吐珠

戊子歲穀雨日

中丞王兄令李子師中攜名酒洛花相餉作詩以謝  
殷厚

洛艷紅嬌醴味佳併攜春色照人來  
豐苞細折先三嗅  
醪蟻連傾盡數杯  
北里定應香作陣  
西園休詠眼慵開  
維摩久病行當問  
好在春光紫錦臺

括九峯禹貢解北條北境之山

晉北諸山自代來

自寰武嵐憲  
四州而來

胚凝首自霍山開連延

脊脉為壺口南作析城王屋排復折而西雷首出一支  
北走太行崖又次一支為大茂四條明白不須猜

大卿徐先生挽章

諱世隆字威卿金進士第陳州西華人官至集賢閣大學

士故

註明

壯歲魏科擢上游如公樂易更風流文章海內元推轂  
議論行間宋與儔鄉校功成東魯盛炬蓮恩在北門優  
自憐狂散慙提獎爭遣鱸堂一拜休  
至元二十一年予按部東平拜公於私第之前堂公時已在病眷眷於予者甚款既而卒於家

壽總尹劉公

一家英氣蓋遼東聞說君侯有父風作牧首分青社土  
策勲誰比黑河公化行屬邑謳歌裏春自慈幃孝養中  
今歲壽筵光景好榴花渾似舞裙紅

龍教授哀挽

東郡教授龍君名華字取新廣安人善賦學及五星  
等術士子從之學者多所沾丐至元辛巳與予相遇  
於滑朝夕從游者旬日一良德君子也後至魏縣簿



政有聲及茲云亡其子夔來求哀挽章特賦

當年按部館南衙日夕相過興未涯  
楚產例佻開實學天星推度見名家  
大伾山下游龍洞歸雁亭邊望暮沙  
此日題書重惆悵為君回首眷西華

商左山哀辭

商孫膚敏矯游龍千載留芳見此公  
佐魯謀猷元克壯定秦功力更沉雄  
城門被熱池魚涸臣罪當誅聖主聰  
老淚不緣知已痛麒麟臺上又秋風

夾谷尚書哀挽

名之奇字士常  
終吏部尚書

品彙流形萬不同  
銓量平允儘消通  
恩非出已知誰怨  
天不遺賢見道窮  
三復苦辭歸汶上  
一官催老淹曹東  
茫茫大塊升沉裏  
重為清朝惜至公

追挽承旨王文康公

文章四海一康公  
炯炯元精貫日中  
廬肇名先金榜重  
歐陽仙去玉堂空  
道由實學明真用  
義不忘君見至忠  
惆悵當年門下士  
斷雲低處望曹東

左丞史公哀辭

并序

左丞史公之薨客有云云者余曰事機之來雖理有難處度不違於義其寵辱有不足驚者當克明之無定力以順受輕則伊鬱而自阻重則憂悸而隕越正以不安而無定力故也嗚呼史公不少隱忍以光先正之業而至於斯其命耶抑以有未安於所受之正耶於是作是詩哀之

兩鬢金貂漢九卿泰階平日栢臺清儘將事業傳鐘鼓

不特家聲籍父兄自忖行藏無所歎此身榮辱不須驚  
辨姦聽徹唐君說淚洒西風滿豸纓

丙戌歲中秋後二日夢過真定與宣慰張鵬舉

相會作詩為贈既覺頗記首尾意韻因足成

之

九月十一日和爾揚布過衛  
說張子是月日卒於真定

千里提封入控臨不知秋氣上華簪紫泥頒寵膺三詔  
丹宸輸忠見六箴機務固方前日簡論思尤比向來深  
無端得共團圓月轉覺孤懷愧此心

漫答憲副良友

十年侷促伏轅駒解鞅歸來樂自如奔走止緣餬口計  
支離況是不材樗常因客過知安健多謝人來問起居  
把酒竹軒猶昨日清思相似向來臞

寄贈介甫憲倅聞除興元總尹

方聽新除入歷城忽傳改授漢中行霜空暫息鳶飛翮  
民社教優撫字聲興利試尋山水堰遠征先恤異方兵  
如承高省相垂問老我山田二頃耕

送徐正卿秩滿還漳南

共筆燈窓憶昔時只今相顧鬢成絲  
三年調議良多益一道將迎不易持  
辭別已餘連日惡直清儘在後人思  
漳南未是歸棲地要與朝家作羽儀

謝湯宣慰惠書

閒來何物慰窮愁細把調元入校讐  
相業有方無限事室書能幾不容抽  
已欣惠賜承蘇集復夢翻香上郡樓  
插架萬籤容遍覽鄴侯人道是湯侯

代書寄友舊二首

匪為窮愁日著書  
閉門經史且相娛  
為憐魯酒無多味  
任使陶瓶乏見儲  
黃卷能教吾道在  
青雲未覺故人疎  
有時夢到烏臺月  
奄奄猶勝載五車

半紙功名不足書  
暮年心事若為娛  
背時伎倆輸鳩拙  
度歲生涯儉擔儲  
為寂恐貽高密笑  
不才爭似孔融疎  
退藏入密真吾事  
誰遣門多長者車

西村三首和韻

種來佳樹日扶疎秋草當階不忍鋤城府事囂閒靜重  
林墟秋熟物情舒溪行改徑農耕後漁捕移梁水退餘  
我自興來成獨往手拖拄杖不巾車

近歲行藏匪自疎胃中刺鯁要誅鋤通明縱使同方進  
樸鈍何知似魏舒堂上呻吟從肉食橋中游戲喜霜餘  
八駟前馭非吾事正要安徐下澤車

忖量身世兩乖疎去學淵明荷短鋤時事未容閒裏過  
人心安得老來舒沙鷗遠泛機先識穴鼠深藏壤有餘



我輩所行多倒置旱資舟楫水資車

寄道之憲使仁兄

非為場苗賦白駒別來多事復何如臣門最喜心如水  
故地猶知里號樗落落壯為天下客潭潭老向府中居  
為近日二憲使俱不出故云使君若問年來況山澤依然老病癯

聞平章游公薨於維揚以詩挽之

邂逅灤江讌語頻外臺初建首先分風雲契厚真吾相  
魚水情深有分民名在諫垣稱鯁直力輸王室最公勤

豐碑會見十年後猶是中朝第一人

丙戌除夜

盤花紅卷燭光搖一歲迢迢盡此宵  
凍折臘香浮栢葉暖移春意上梅梢  
拊心自信愚忠在流涕還悲髀肉消  
揣分要知溫飽力此生無地答清朝

賀文卿同簽宣慰河朔

時真定連年旱灾

春風花發四鄰香曲巷時過笑語長  
議論有方消鄙薄功名無地不輝光  
簽書樞府孤忠壯愾敵長江一葦航

今日八州歸總轄又煩和氣致時祥

同簽趙公挽辭

諱良弼字輔之遼東人至元二十三年南遊京洛卒明年正月

二十四日夜見於夢託予合易其名諱辭意甚切不然目將不瞑矣遂作是詩以紀其意

識遠幾沉任獨勞不將虛譽冠時髦使華光動扶桑日  
樞府謀深尚父韜四海樊川遺隱在九年精爽與秋高  
分明夢裏來相託抵掌猶能似叔敖

禮部尚書許公挽辭

當年劍履上星辰忠謹持心老益振藥籠功名開壽域

朝端風度見誠臣  
勒漿有味霑餘論  
卿月分光照近鄰  
吾自訃音爭悵望  
白雲長處是潯垠

凶訃初傳不忍聞  
惜從朝著失忠臣  
安常每懼非常寵  
格物還深濟物仁  
貶損定交何眷厚  
燕閒相過更情親  
鞦韆細約車聲去  
長憶同遊過闕晨

宋賓客宏道挽辭

景玄絕學到縱橫  
此老猶能見典型  
相府才華推上客  
少微光彩動前星  
誠身初不離儒行  
進學何妨雜貝經

正有莫教傷餒恨併隨神劍閔泉局

公舊有舒辟劍

萬有紛華入醉吟都將誠靜粹靈襟雲松卧壑存初志  
望苑霑恩豈本心談並齊諧疑志怪學空滄海別穿深  
斗間縱有龍泉氣淒斷春風綠綺琴

追悼叅政李公仲實詩

并序

至元丁亥二月十日夜夢李叅政仲實再拜向予顧  
指所佩鞶囊曰吾平生盡在於此他日會須累君但  
不敢輕易發也既寤悵然者久之因追作此詩以見其

神交之不昧也昔李衛公見夢於令狐絢懇其北還  
絢畏其精爽白於帝得以歸葬今李侯明以後事來  
託予老且閒不知何所賴焉

冠劍風雲擁漢庭斗邊喉舌振孤聲漢儲羽翼非輕託  
蜀酒雖多每細傾身後哀榮光謚冊夢中精爽似平生  
分明指顧輦囊事一縷幽光要累卿

挽教官石仲遷

名興義鄭州人少為縣吏後  
從李野齋學終南京教官

臨試東過僕射坡封書投贄識君時生猶櫝玉期三獻

死愧囊金昧四知  
塵世驚回黃葉夢  
帝京悲動白雲辭  
因思吾輩豪雄處  
貧賤能安貴不移

送府判李侯赴調東曹其懷政備見乎詞

邙衛交衝辦事難  
送迎終日不停鞍  
去官不到瓜期代  
在分能教幕職安  
衙鼓通嚴披訟牒  
厨煙吹碧淡蔬盤  
回看奔走風塵際  
却惠新除是振冠

代書奉寄子明宣慰

時為濟南宣慰

五載因官寓濟陽  
朋簪盍處珮聲鏘  
金盤亂醉雲溪酒

綉騷同披燕寢香樂事有懷終會合名泉無計共徜徉  
空餘情似康崖水一脉勾連到海長

騷一作騷其物反乃今之半臂也出

光武紀

### 壽子初中丞

鼓瑟春風記點同轉頭俱作白頭翁遠遊長得知時報  
微恙行收勿藥功巾卷在庭隨燕几嬰風和露濕簾櫳  
暮年縱有周公夢輸與浮雲度太空

### 送史邦直之任竹山



縣屬房陵更在西一官雖遠儘施為王風漸被無遐邇  
異俗能安戒鄙夷會待奇姿超駿足試教銛穎發囊錐  
彩旗開簇清江渡想見春風到任時

丙戌歲除夕

去歲椒盤一笑樂今冬除夕倍凄然  
莫餘靈案鐘聲後坐對陰容燭影前  
存沒不堪思往事康寧還喜過今年  
數家剩說新春好夢到梅花小雪邊

奴星具糗送窮歸夜久蘭堂燭影低  
梅雪溢寒嚴厲鼓

枕香留暖潤盤犀  
試傾臘醞歌椒頌  
已覺春風拂畫雞  
明日書雲臺上去  
蒼精橫角看杓攜

秋澗集卷十九

欽定四庫全書薈要卷一萬六千一百七十六

集部

秋澗集卷二十

元 王惲 撰

七言律詩

西溪見夢

十月初八日  
夜五鼓初

柱面相看几格間，笑談似與浣離顏。  
起裝已辨宜趨往，江路雖遙不久還。  
魯國自來尊北海，謝家誰更作東山。  
瀟瀟夜雨蓬窓曉，細酌清樽與淚潛。

儀封道中

驛館殘缸曙色分馬馱殘夢走踈踈去家已遠誰為侶  
到處相逢有故人健美鵬盤慙始擊靜便蠖蟄返求伸  
一杯拜酹睢陽廟激懦扶衰尚有神

睢州道中寄友人

奉詔東行獲所安却憐衰朽強為顏恩緣至渥酬無地  
事不預防多後艱遠馭有方清百越纖埃何補奠三山  
殘年正要相料理既不容辭望蚤還

過歸德寄何相

白髮年前六十三強扶衰朽去江南心知義重吾何惜  
老不身安事恐耽弩末縱能穿魯縞病軀何可敵閩嵐  
鄉關回首四千里正累君侯與細參

十月廿七日過下邑喜與趙彥方侍郎相遇作  
詩而別

暮色增寒慘驛亭燈垂紅燼盡情明長年幾夢溪堂月  
此夜相看下邑城流落蠻方真可畏笑談樽酒且同傾  
回頭楚水楓林下焰焰聲華定彥卿

宿宋家山趙氏田舍

白髮搔來不滿簪  
就中誰遣世塵深  
野烟遙認圮橋月  
霜夜初聞楚戶砧  
長路苦吟支睡思  
客憲無夢耿鄉心  
前行說似安夷道  
隱隱青山轉柵林

揚州送劉漢卿東歸汴梁

海鶻翻雲下錦鞬  
眼中人物見風流  
誰期淇水三秋別  
却作維揚數日留  
樽俎留連江上月  
風烟吟眺竹西樓  
馬頭細嚼梅花句  
又領春風入汴州

西湖

西湖三面簇青山，淨試菱花照翠鬟。  
滄海月寒龍穴露，彩雲仙去鳳簫閒。  
無多樓觀猶圖畫，最好風烟近市闌。  
鄭重繡衣周漕使，畫船春酒待余還。

留別左轄台相

兩浙江山漠霧雲，吳儂輕剝到羣奔。  
纔寬防異須威霽，稍困隨方以德存。  
龍寵優來心愈小，義方嘉處勢忘尊。  
忠傳孝繼平生事，長見風烟擁戟門。

一云薦賢正是台  
衡職桃李何須在

乙亥仲冬三日與宣慰楊子秀總管高瑞卿侍郎田榮甫三君子邂逅於餘杭其喜有不勝者以詩留別情見乎辭

北來冠蓋拂吳雲  
試計分飛動十春  
意外論交緣義重  
天涯相置更情親  
放懷樽酒難同舊  
照眼梅花總可人  
明日浙江江上去  
寄聲多逐荔枝塵

下大安嶺

俗云分水嶺



宿霧霾山苦未收馬衝寒雨下關頭紅雲軟脚揮三爵  
碧玉攢峰擁萬丘日月麗天從北轉山川分水盡南流  
漢家風教今無外誰遣妖氛孛斗牛

時汀漳等州鍾寇  
作耗未平故云

### 三山元日

臺熱花香簇絳紗三山簫鼓樂年華竹枝歌後多淫祀  
燕子歸來識故家荷鬢開裝餘翠貝蔬盤勻飮雜魚蝦  
時方風物雖堪賞爭遣衰年客海涯

### 贈之問前尹

福州庚寅三月  
二十一日作

社燕秋雁十載餘天涯邂逅兩臞儒九遷論秩心何有  
百折當年氣自如喬木故都思往事月明滄海烟遺珠  
春風回首同城郡時訊平安見簡書

送李司卿輔之北還

李司卿名天祐安次人與  
余同年為御史今為戶部

尚書今

北還

憲府乘驄憶舊遊白頭相見嶺南州地連瘴海三山月  
人在元龍百歲樓此日又驚成契濶異方誰與慰淹留  
交親若問衰年況夜夜秋瓜夢故邱

庚寅春三月與張叅政獻子李司卿輔之會飲

九仙絕頂其道室榜曰滿目雲山

四千里外同羈旅三十年來老弟兄樽俎喜陪今日宴  
江山難得晚來晴岩花帶露春容濕醉袖翻香笑語清  
莫對雲霞說輕舉蒼生料理正煩卿

時張叅政奉旨  
科八州民數

暇日登道山亭懷古

亭在烏石山巔有碑刻南  
豐記文其上刻鄰霄臺三

大字

閩會東南控嶺溪斗牛無亭歲無饑文風興盛猶唐館

霸氣沉雄入劍池  
海近重城朝日蚤  
山蟠平野暮江遲  
危亭一片瑤鐫在  
晤語殘陽倚杖時

送師彥貞藺寶臣二御史

庚寅四月十九日

半歲相陪百越東  
救時人道向來聰  
劍華光動蛟螭匣  
豸角霜嚴簿領叢  
明月共看千里隔  
劣峯回憶一樽同  
偕來不及成偕往  
目斷三山羨去鴻

大中德長老見贈竹輿作詩為謝

人老筋骸不自持  
乘堅策駿兩非宜  
憐師雅意慙慙甚

惠我斑興結束奇花底徐行閒看處陌頭趨進早衙時  
醉歸更比籃舁穩一任三公倒接離

贈鼓山長老平楚

不下禪床四十年老軒頭角出冷淵久從貝葉傳心印  
來與雲山結靜緣蘭馥蕙光增嫵媚竹風松月共清圓  
荔丹有約重登覽轉首天風恐颯然

楚有畫蘭  
絕句故云

庚寅夏四月送二御回淮安道中即事語知己  
者

五千里外一哀翁八郡規為一省同衆口鑠金方作異  
諸生鳴鼓欲誰攻寒封老栢常年慘暖借繁葩盡日紅  
夢到垂虹亭下水雲帆千尺挂秋風

遊鼓山五首

并序

鼓山在閩中為特秀余到官五月王事鞅掌未遑登  
覽以盡江山之勝迨明年四月庚辰遂與天平張參  
政獻子大都李郎中德昌御史聊城師彥貞居延薩  
寶臣提刑東原曹仲明憲幕張遂良程舜臣何舜卿

來遊尋前盟也辰刻抵戒院捨鞍肩輿迤邐而進至  
望州亭主僧平楚來迓用軟脚例酒數行歷松關由  
石門入白雲寺適簽省樂公亦供佛來此來相與禮  
像殿浴佛於西寮既而飯劣峯丈室眺上方重閣降  
觀湧泉步入靈源洞度喝水岩登天風海濤亭觴咏  
間獻子德昌扶攜上征徑欲造大頂峯足觀紫陽遺  
刻石與雲荒中途而返時宿雨濯山林壑爭秀烟霏  
空翠有顧揖不暇者莫不欣然忘歸冲冲若有所得

僉曰樂哉今日之游也吾儕越在絕域縱此重來恐  
無復此歡耳至元歲月不可以不紀詩亦不當無也  
明日探囊得唐律五詩俾刻諸亭上以為中山故事  
峰回路轉已層雲望遠風烟接海門海靄去收千嶂雨  
老僧迎勸半山樽岩幽選勝窮詩境山迫登危黯客魂  
濶絕殊方同大塊坡仙心事強為論

筍輿同駕躡鼇臙冷帶秋聲入白雲雪竇有禪容暫叩  
名山無分與平分雲憐嶺斷聯松蔭雨惜堤芳護蘚紋



會約贊公重借榻鼓音同向夜深聞

上方遊遍雨花天  
洞壑尋幽得壯觀  
林影蕩空金界潤  
天風吹袂海濤寒  
江山若爾不一醉  
杖履再來無此歡  
詩在眼前拈不出  
碧瀾秋色上層巒

杖藜尋壑遊初遍  
倚檻冥搜興未闌  
濁酒一杯方大嚼  
暮烟千頃要奇觀  
放教眼界寬無際  
徑上山椒不作難  
若欲攀蘿窮絕頂  
海濤風勁不勝寒

複嶺重崗莫七閩  
鼓山東峙最重尊  
嶼亭詩好風濤湧

靈洞龍移窟宅存千尺翠層宜晚對一泓滄海儘雄吞  
雲烟稠載歸時晚月偃松梢玉一痕

道山亭燕集

霜簡無華鷲鳥朋追隨飛蓋上高亭霏霏空翠霑衣濕  
浩浩雄飛拉瑟聲已愧東山空雅志枉教南斗避文星  
憂來猛把欄杆拍轉覺時情未易評

酬余招討見贈詩韻

秀孕江山氣自靈余君襟度玉亭亭高軒過訪承佳什

世事開談見遠經  
秋色望空喬木國  
海商爭泛客槎星  
又聞占籍多陰積  
一戶從良近百丁

送魏叅政赴邵武

時與江西三省合會破賊

畫省分麾出越營  
跳梁黠鼠已潛驚  
環郊多壘真吾責  
報國丹忠在此行  
獸困可擒須急縛  
民安無畏是佳兵  
遙知帳繞生犀地  
草木風前總戰爭

戰一作捷

省郎李應中見示所藏書畫因題其後

畫省官書不片閒  
撥忙能結淡中緣  
吟餘紅藥階前露

夢到蒼苔月上船  
鑒定正煩君具眼  
收藏還擬世珍傳  
古人已矣精華在  
時復橫披一洒然

八月八日雨中書懷

自到閩中十月餘  
老懷未省兩眉舒  
命緣限蹇行多拙  
心與時違意轉疎  
夜枕有蛩妨睡思  
秋空無雁繫鄉書  
桂香簾幙中秋近  
愁對清暉憶故廬

小樓秋望

芙蓉吹老白蘋風  
隰有游龍草有蛩  
湖水已翻寒日影

火雲猶作夏時峰清時還負無能貴老境其如所事慵  
堆放小窓閒寓目秋來無物不愁容  
頸聯一作時方多  
故增心苦人到高  
年所  
事慵

寄紫山憲使

去冬相從入臺叅君任平江我更南不惜殘年趨海嶠  
擬將風義壓烟嵐得時可進成虛步縱說知難到強談  
歸見紫山如有問此身與世百無堪  
頸聯一作碧雲暮  
合人千里白髮愁

多雪  
滿簪

秋雨

秋景蟠空勢莫驚  
西風吹起傳岩霖  
驅雲湧海連三日  
潤物回空抵萬金  
火傘炎收閩嶠瘴  
烟螺重拭越山岑  
滂沱未洗戈船甲  
愁絕孤臣一寸心

御史陳君濟來知紫山病告已滿浩然北歸余  
以微官自絆留滯閩中未卜歸期定在何日  
慨然感而賦此

南來同仕君先往  
自絆微官固可憐  
書考已甘楊子下

著鞭又為祖生先碧雲暮合人千里白髮愁攻雪滿巔  
去去吳江西下路姑蘇臺上月空圓

寄叅政何公

黃閣年來相業多忠腸輸瀉略無他物情雖異歸已總  
鼎味能甘賴爕和客子遠聞欣欲舞海風何慮偶揚波  
時草竊遙起故云殘年喜見昇平事歸老田間儘浩歌

寄左丞馬公

黃閣風清相業多漢家幾務到賡歌默涵羣動歸已總

力贊孤卿罄爕和春草間嘶沙塞馬秋霖行洗越船戈  
古今多少調元樣丙魏聲華未減何

即事

耳病瞳昏久病翁暮年遊宦又閩中一旬好快無三日  
百計隨人到五窮每署細銜慙已曠雖無私過亦何功  
揣量薄分宜歸去免着通人笑未通

卧病中即事

萬慮消磨只一身一身猶為病邈迤老饕纔助脾神喜



濕熱還攻眼力昏疏飯半盂嗟強食物情千古苦難論  
前期七日多能幾更有何心到競奔

即事

地僻天荒自一方江山還鎖瘴烟鄉炎涼失節人多病  
勁躁難馴俗反常媚竈王孫方怙勢背時郭老怎當場  
欲行莫克行還阻乞取閒身且六藏

芙蓉

草生不識翠苞纖真色還欣到爾瞻嬌綻蔡芳無兩樣

開裝橙葉更多尖一溪野水明粧鏡滿樹清香拂繡簾  
開謝已甘秋色晚碧桃紅杏我何嫌

卧病吟

四大尋思孰主張百般調護不康強火頭孛尾方為崇  
肝氣脾神互見傷秋月欄杆吟袖吟曉烟亭戶藥鎗香  
夜來一笑伸眉喜夢裏分明到故鄉

閩中即事

誰作新詩採衆謠八州淵藪萃逋逃蒼烟滿樹驚臬嘯

白日西山聞虎號取辦急征農最仰空哀懇彼苦何高  
內奸不止終多寇鬪敵徒教殺爾曹

八月十八日野真回入西湖開化寺

廩祿已沾三品料浩然歸志苦遲遲宦情老去無多味  
花樣看來總背時庭下宜尋歌鳳侶澗阿閒詠考槃詩  
免教方寸為形役惆悵終年抱獨悲

送趙提舉職滿還江西

字仲遠

眼中薄俗日紛紛信厚如麟見趙君學館久淹雖散秩

士林輝映總多文三年提調無遺育回首歸飛隔暮雲  
忠孝堂前秋色好淡烟吹滿泮池芹

卽事

人微職峻作提刑正似禪僧放海青癡坐久爲山鳥怪  
急歸已愧草堂靈甕邊吏部方酣飲澤畔靈均謾獨醒  
樂得便行無窒礙雲間高躡鳳凰翎

悠悠心事欲誰同甚是留侯智與功幸有釣舟藏夜壑  
免教官事縛微躬旬多病假慚虛位獄有繁寃漫熱中

穩送布帆無恙去小樓昨夜有西風

西風吹老一川秋劍水東南送客舟寒雁遠賓方漸陸  
野鳬羣聚正乘流飛鳴聊欲伸吾志飲啄非徒為食謀  
通塞既知皆素定平泉何為志窮愁

題建寧府建安堂壁

郡名改自炎興後官事多從五代年草木不知黃落候  
江山渾是寶岩天風時雨若回天眷味厚泉甘覺氣全  
城府自來多險隘高蹤誰躡漢梅仙

東山稱梅隱云  
梅福常隱於此

子孺腹病良愈謝全王二醫官全名立夫王名

貴和

喜向醫林得二髦河魚為祟免憂勞調和臟氣事為切  
護養丹元論最高曾未浹旬收勿藥並驅二豎不容逃  
難忘更有真誠意答荷千金恐一毫

活庵方伎若為高濟物心驚不代勞子孺病來方作祟  
脉原看處若為毛臨機制變元多算勿藥收功大可褒

自是理明窮隱爽不緣潛授老龍韜

非六韜之韜蓋借用孫思邈昆龍所

授之  
法也

贈三岐儒醫徐登孫升伯

徐卿奕世傳醫道學濟岐人蔚有功方自千金開壽域  
肱非三折見良工經橫烏几筠籬靜門掩朝暉藥竈紅  
我似病梨無可賦略煩料理少陵驄

又題石橋山

龜阜烟霞小有天半空竒絕石橋山蒼龍背偃雲千疊  
寶月光涵玉半環當局仙人閒遣興爛柯樵子不知還

一樽醉上山翁馬却逐流紅到世間

繼李昌道見贈詩韻以寄

當年初識歷亭仙貴眼相看意愜然把臂喜談天下事  
洗心如聽玉琴絃時文變古多君雅遠馭長驅並我先  
北渚風烟儘瀟洒興來詩思想無邊

遐觀亭

南劍州總尹  
張侯所構

閩右江山第一州危欄高倚九峯頭大書快覩凌雲榜  
神化空驚躍劍舟冠蓋送迎無少暇煙波吟眺暫相酬



曉涼多趁薔薇露醉墨淋漓想未休

九日南劍道中

龜山山長林元中和韻有云萬里好風南去雁兩溪明月一歸

舟

颯踏弓刀入劍州登臨高出碧山頭松風度嶺吹紗帽  
烟水漫溪送客舟萬里故山今得往一年佳節儘為酬  
滿樽綠湛茶洋酒空對黃花一笑休

憫雨呈幹臣詩友

四月十一日作  
時闔郡祈雨

天人消息兩交通和自羣情雨意濃一旱迄今幾五月

四民作苦最三農雷燒赤尾空驚電雲捲黃頭又變風  
傳語龍棚棚下客孚誠終始要相通

嗷嗷羣動日焦枯何處癡龍睡未蘇穀未見苗稷可望  
麥方含實勒來無九關變豹無餘蘊百郡承風恐失圖  
試手天瓢儻微恡斯民斯苦果何辜

和錢神咏

解穀開難到處行雖云銅臭最關情世緣利益稱泉貨  
時便流行託楮生武子矜豪編竟埒魯褒貽笑愛如兄

細思最是通神處買盡人間事不平

巨室權門坦蕩行反於窮薄略無情散飛庭樹來無迹  
污濁羣心到處生取象有天還有地縱貪無父亦無兄  
存心思革交征弊何處銅山剷可平

芭蕉扇

輕箴如蕉一樣新楮衣筠骨製來勻隔窓雨落驚真葉  
洒面風清來故人常羨楚材為晉用却嫌紈素化緇塵  
會當柄在調元手與播南薰解愠民

近讀夜永不寐等作覺清而頗寒吾恐傷中和  
而病吾子也因復繼前韻假辭而薰炙之亦  
晁補之擬騷之遺意也幸笑覽

燭影紅搖夜色侵香添菱葉鬱重衾鳳琶調軟歌能合  
竹葉杯深醉易沉綠鬢追懽燕市樂翠輦歸夢越江吟  
平明剩買扶頭酒不向諸兒計橐金

久坐虛窓氣夜侵欲眠還未擁孤衾書因倦讀從燈暗  
物不撓懷任思沉肥遯世高雷子節清貧時見曲山吟

舊游相望成三老既老能閒抵萬金

和曲山覓菜詩韻

鼎餽藜杯一概平見君胸次匪鉗罟屢聞飯糗同鰥孀  
似要侯封號憂羹靈府天和流玉薤露盤詩思湛金莖  
腹腴蹯脆皆吾欲二者難兼恐物情

貧富因君歎不平食前方丈對羸嬰一簞雖具黃梁飯  
滿豆常空碧澗羹甕料不聞波底語秋光時見鬢間莖  
細思清苦多吾輩愈見蒼蒼責備情

和幹臣詩魔韻

倦懷欲罷不能回  
啾唧嚶嚶雜歎歎  
清禁事嚴微服入  
華山峰好倒看來  
禁持作祟非無謂  
狂斐緣渠不解裁  
島瘦郊寒遺像在  
至今追想日悠哉

詩家何苦似魔為  
遠紹旁搜沒了期  
鼓舞有舒還有慘  
禁持似醉復如癡  
鼎邊苦思多窮夜  
江上冤魂獨語時  
伴老此身成底事  
乾坤清氣幾人知

睡魔和韻

醺然一氣熱相纏不是晡時即午前  
鼯枕丸無所濟昏明心鏡陡相懸  
見侵多是羣疑後澄治無如一敬先  
不羨老歐能善變化為鸛鵲舞翩翩

欠呵舒挽速如神不是愁縈即思焚  
釀就黑甜濃有味撓昏靈府闇無聞  
魂遊纏老三峯客茗戰摧空七碗勲  
經事不為渠所泥邊韶便腹見多文

和幹臣齒痛詩韻

硬嚙豪餐養老饗先生編貝若為牢  
熱流肢脈知來漸

痛拔孤根訝許高  
總使舌存宜晦默  
更堪心苦恣焦勞  
休休事事從輕減  
急手先須止濁醪

折齒吟自慰

朝來折齒五神驚  
勢若山為朽壤傾  
缺豁醜於韓子態  
嘯歌妨似幼輿情  
病根何益華池漱  
五色空傳幻術生  
駢潔浮危雖自取  
世間何物不虧盈

適見總府應詔薦章偶得一詩庶明鄙意呈幹

臣



齒牙缺豁雪蒙頭更有何心接俊遊  
一自詔條頒雨露  
盡催遺逸起林邱  
韞藏櫝玉知無限  
刻畫無鹽最可羞  
經濟斯時公等在此身  
天地一虛舟

寄胡紫山提刑

蒼顏白髮兩衰翁  
前歲將翔馬首東  
常喜笑談猶不淺  
靜思行止畧相同  
閭門凍鎖連江雨  
瘴海炎開發屋風  
兩度生還幸無事  
更何心到炬蓮紅

寄六祖真人

涉世筋骸百不堪只堪老坐老書龕視難遠矚目全眊  
聽不能聰耳漫耽臂痛帶來梅嶺濕心煩漸遠瘴江炎  
客來問訊承佳意蓄縮其如白老蠶

五月八日同幹臣遊耿家池上

偁促城居鶴繫籠綠荷池上暫從容花明淡灩波光外  
詩在扶疎樹影中老厭宦遊追俊彥天教閑處著疎慵  
日斜尚約遲遲去散座高槐洒晚風

和幹臣山居

細想山居有足論  
既便嘉靖不知貧  
霜封幽谷收明粟  
水漲前溪送束薪  
茂樹坐移隨所適  
良苗耘罷見懷新  
隱居不見求高意  
千古淵明最可人

頸聯一作樽酒相勞鄉曲厚樹林交

蔭鳥聲新

山中有樂試為論  
石上無禾未是貧  
溪隔圃田多滯穗  
霜摧林葉自添新  
醉談有味漁樵熟  
野飯加餐笋蕨新

大朴散來非復古  
隱居求志果何人

一作半道閒談留荷蕢隔林孤唱聽

樵薪甕筍春釀雲移舊園摘秋葵  
露葉新朝吟樽湛芳醪  
醲夜話爐煨紫芋新時耕白水  
親收稻日斫青山自

薪負

隱仕初終絕異倫  
淵明憂道不憂貧  
比如違己心翻病  
何似行歌自負薪  
意外風波平地險  
山間煙景四時新  
此心只向黃塵老  
笑煞羲皇以上人

和幹臣以目疾詩相傲

老來襟抱百無圖  
遮眼唯便幾頁書  
不爾心神渾散漫  
豈知目力陡乖疎  
晚年愈種玄花盛  
平日豪吞綠醕餘  
氣習屏除元易事  
急須顛倒坎離居

常倚精神壯未殊有時豪飲痛觀書形骸未化無非苦  
寢食其間敢自如赤貫瞳人昏若蔽濕留肩井冷難除  
人憑手眼今如此更有何心望玉除

時往往傳余有  
翰苑之命故云

### 掃晴婦

今年夏六月初方雨凡六日不止前去秋節止廿三  
日亟晴秋種生發能有幾日又諺云秋後一十八日  
百粒不結已種者為雨拍艱於出壠方種者塲土粘  
濕不易耰作兒子輩戲作掃晴婦懸之前簷明日開

霽因作是詩以見其意云

淡粧烏鬢綠衣衫一線高懸舞畫簷笑著茗枝揮素手  
盡驅雲影入蒼岩掃晴旣出兒曹戲指日何殊父子談  
百穀近秋苗未茁羲和先斂壠頭粘

江山萬里圖

勝覽何人作此圖雄誇天險亦區區經營意匠羣工上  
慘淡風烟百戰餘並轡相夷嗤宋魏舞干來遠美唐虞  
只今一統無南北正要懷柔謹厥初

一作指顧漢封真  
米聚追奔秦鹿北

山虞

江山列地出新圖  
限隔東南見奧區  
與校廟謨雖有間  
細看邊備到無餘  
忌功去介甘捐蜀  
併力忘金笑假虞  
千古美芹高議在  
不應成敗論終初

喪馬和幹臣韻

大夫而後不徒行  
為罄囊金市此乘  
耳削秋筠分額鬣  
臆團孤月映鈎膺  
長鳴尚憶看雲立  
論力空懷以德稱  
得失塞翁深領會  
天教閑坐看飛騰

過郭璞墓

墓在金山西北大江中流亂石間有叢薄鴉鵲棲集望之如蒼雪者蓋鳥

也矢

青囊書秘造精深葬法人傳冠古今一死祇緣撩虎尾  
孤墳何故葬江心師從鬼谷宜多怪山湧胥濤不寸侵

世言江雖大漲水不及墓

我特回舟酹公去翻翻寒鵲落蒼岑

一作舟過

亂灘無所見寒鴉蒼雪滿荒岑

佛狸祠

在瓜州城

江山照眼舒清眺千古興亡墮眼前瓜步市長連野戍



佛狸祠古慘荒煙  
施樓看取平吳日  
父老空傳飲馬年  
此日不須開濁浪  
好風都屬往來船

即事三詩奉呈幹臣明府詩友

辛卯四月  
廿六日作

鯨鯢苗夷並放驩  
九官相讓濟時艱  
閭閻有喜科差少  
烟火全疎傳舍閒  
雨澤潤寬無遠邇  
詔條恩溥到惇鰥  
聖恩撫御超前古  
慶歷元和未易攀

恩書一札變虞驩  
盡革前非免後艱  
星影不搖天宇靜  
邊庭無事羽書閒  
震霆摧惡無留枿  
霖雨思賢到有鰥

若把古先相比擬周成唐憲敢躋攀

占法云民勞則天星動搖

岩廊吁咈處工驩萬死猶難謝世艱

向奉御禿列死先令野狸爪啣其膚

今相哥自請死同禿列闕

若教汝便死天下人謂我何

為念民瘼深顧畏自裁

書詔畫防閑求賢不啻飢和渴發政常先寡與鰥鰥虱

小臣雖片善一時鱗翼盡期攀

今歲自二月至五月凡兩降詔條皆出自聖裁

韓齋小集呈幹臣詩友

辛卯十月十日

十日秋霖不出門偶同藜杖步城垠故人雅有平生好  
樽酒時陪一笑溫野菊翻香憐晚節露菌團蓋任朝暾

暮歸欲乞天孫巧却嘆儀曹是妄論


送同仁甫之任武陟

寬則民輕猛則殘化行州縣固應難紀綱總務見常課  
臺閣推勞不素餐能盡絃歌千室樂何憂風雪一家寒  
來辭請益吾何有一札恩書與細看

秋澗集卷二十

謹按卷十九第十七頁後五行和爾揚布舊作忽英甫今  
改





總校官進士臣胡榮

校對官學正臣卜惟吉

騰錄貢生臣袁瑩